

3-9 JANEIRU

RIKUSOIN HUSI BÍBLIA | JUÍS 15-16

“Hahalok traidór mak aat tebes!”

w12 15/4 p. 8 par. 4

Hahalok traidór mak sinál ida kona-ba laron ikus sira!

⁴ Ezemplu primeiru kona-ba ema ne'ebé sai traidór mak Dalila, ne'ebé Sansão hadomi. Sansão hakarak dirije funu hasoru ema Filístia hodi salva Maromak nia povu. Karik ema Filístia nia ulun-na'in na'in-lima hatene katak tuir loloos Dalila ladún hatudu domin ba Sansão. Tan ne'e, atu sira bele oho Sansão, sira hatete ba Dalila katak se nia buka-hatene saida mak halo Sansão forsa tebes, sira sei fó osan barak ba nia. Dalila koko dala tolu atu buka-hatene, maibé la hetan susesu. Maski nun'e, Dalila “obriga nia ho ninia liafuan iha tempu hotu no kontinua haka'as nia”. Ikusmai, Sansão “lakon ninia pasiénsia to'o sente atu mate” no fó-hatene ba Dalila katak ninia fuuk nunka tesi, no se ema tesi karik, nia sei lakon ninia forsa. Tanba Dalila hatene ona Sansão nia segredu, nia haruka ema ida atu tesi Sansão nia fuuk bainhira nia toba iha Dalila nia hitin. Depois, nia entrega Sansão ba ninia inimigu sira atu sira bele halo buat naran de'it ne'ebé sira hakarak halo ba nia. (Juí 16:4, 5, 15-21) Dalila nia hahalok ne'e aat loos! Tanba nia ema ne'ebé kaan-teen, nia la hatudu laran-metin ba ema ne'ebé hadomi nia no sai traidór.

w05-E 1/15 p. 27 par. 5

Pontu importante husi livru Juís

14:16, 17; 16:16. Se ita maña no tanis atu obriga ema seluk, ne'e sei estraga ita-nia relasaun di'ak ho ema ne'e.—Prv 19:13; 21:19.

w12 15/4 p. 11-12 par. 15-16

Hahalok traidór mak sinál ida kona-ba laron ikus sira!

¹⁵ Oinsá mak kaben-na'in sira bele hatudu

laran-metin nafatin ba malu? Maromak nia Liafuan hatete: “Haksolok bá ho ó-nia feen [ka la'en] husi tempu joven nian.” No hatete mós: “Moris haksolok bá ho feen [ka la'en] ne'ebé ó hadomi.” (Prv 5:18; Ecl 9:9) Nu'udar feen-la'en sai ferik-katuas daudaun, sira presiza haka'as an atu halo buat ne'ebé sira bele halo hodi hametin sira-nia relasaun nu'udar kaben-na'in. Oinsá? Feen-la'en presiza nafatin hakbesik **ba malu** hodi hatudu laran-di'ak, tau matan **ba malu**, no uza tempu **hamutuk**. Sira mós presiza haka'as an atu proteje sira-nia relasaun nu'udar kaben-na'in no sira-nia relasaun ho Jeová. Hodi halo nune'e, sira presiza iha toman atu estuda Bíblia **hamutuk**, haklaken beibeik **hamutuk**, no mós halo ora-saun **hamutuk** hodi husu Jeová nia bensaun.

LARAN-METIN NAFATIN BA JEOVÁ

¹⁶ Iha kongregasaun laran, iha ema ne'ebé halo sala boot no hetan dixiplina ‘maka'as atu sira la'o tuir dalan loos iha fiar’. (Tit 1:13) Ema balu tenke hasai husi kongregasaun tanba sira-nia hahalok sala no la arrepende an. Maibé “sira ne'ebé simu tiha” dixiplina ne'e, ida-ne'e ajuda sira atu hadi'a sira-nia relasaun ho Maromak. (Ebr 12:11) Oinsá se ita iha família ka kolega ne'ebé kongregasaun hasai ona? Ida-ne'e sei koko duni ita-nia laran-metin, se ita sei laran-metin ba ema ka ba Jeová. Jeová sei haree oinsá ita halo tuir ka la halo tuir ninia mandamentu kona-ba labele ransu ho ema **naran de'it** ne'ebé kongregasaun hasai ona.—*Lee 1 Korinto 5:11-13.*

Ke'e no hetan buat murak husi Bíblia

w05-E 3/15 p. 27 par. 6

Sansão manán hodi simu forsa husi Jeová!

Sansão hanoin de'it kona-ba ninia planu atu luta hasoru ema Filístia. Nia hela iha feto-aat ida nia uma iha Gaza atu kumpre ninia objektivu atu funu hasoru Maromak nia inimigu

sira. Sansão presiza fatin atu toba kalan iha inimigu nia sidade, no fatin ne'ebé di'ak mak feto-aat nia uma. Sansão la iha hakarak atu halo buat ne'ebé la morál. Nia sai husi feto ne'e nia uma iha kalan-boot, tuirmai kaer sidade nia portaun no ninia riin rua, no lori buat sira-ne'e ba foho-tutun besik Hebron, maizumenus dook kilómetru 60 husi Gaza. Maromak kontente ho buat ne'ebé Sansão halo no fó nia forsa atu halo ida-ne'e.—Juí 16: 1-3.

10-16 JANEIRU

RIKUSOIN HUSI BÍBLIA | JUÍS 17-19

“La halo tuir Maromak nia Ukun-Fuan lori problema”

it-2-E p. 390-391

Miqueias

1. Mane ida husi Efraim. Miqueias kontra mandamentu número ualu husi Ukun-Fuan Sanulu (Éx 20:15), no na'ok osan-mutin 1.100 husi ninia inan. Bainhira nia fó sai ninia sala no fó fali osan-mutin sira-ne'e, ninia inan hatete: “Ha'u sei halo santu ha'u-nia osan-mutin ne'e ba Jeová. Ha'u hakarak ó uza ne'e atu bahat estátua ida no halo estátua ida husi besi. Agora ha'u entrega osan-mutin ne'e ba ó.” Tuirmai, ninia inan lori osan-mutin 200 ba badaen osan-mutin, no badaen ne'e “bahat estátua ida no halo estátua ida husi besi” no lori ida-ne'e ba Miqueias nia uma. Miqueias iha ona “uma ida ba maromak sira”, nia halo efod no terafín, no ordena ninia oan-mane ida atu serbí nu'udar amlulik ba nia. Maski Miqueias halo arranju hanesan ne'e atu fó hahi'i ba Jeová, maibé ne'e mak hahalok sala tanba kontra hasoru mandamentu ne'ebé bandu adora estátua (Éx 20:4-6) no nia mós la respeitu Jeová nia arranju kona-ba tenda santu no amlulik sira. (Juí 17:1-6; Deu 12:1-14) Liutiha tempu balu, Miqueias lori mane joven

Levi ida naran Jonatan, ne'ebé mak Moisés nia oan-mane Gerson nia jerasaun, hodi serbí nu'udar amlulik ba Miqueias. (Juí 18:4, 30) Miqueias sente kontente ho ida-ne'e no dehan: “Agora ha'u hatene katak Jeová sei halo di'ak ba ha'u.” (Juí 17:7-13) Maibé tuir loloos, Jonatan la'ós Arão nia jerasaun, tan ne'e la kumpre kritéria atu sai amlulik, entaun Miqueias aumenta de'it ninia sala.—Núm 3:10.

it-2-E p. 391 par. 2

Miqueias

Lakleur depois ne'e, Miqueias ho ninia maluk sira duni tuir ema Dan. Bainhira sira toman ema Dan no ema Dan husu problema mak saida, Miqueias hatete: “Imi foti ona ha'u-nia maromak sira ne'ebé ha'u halo, no imi mós lori amlulik ne'e. Saida tan mak ha'u sei iha?” Rona tiha ne'e, ema Dan sira amea-sa Miqueias katak se Miqueias kontinua duni sira, sira sei ataka Miqueias no oho nia. Miqueias haree katak ema Dan mak forsa liu fali nia ho ninia maluk sira, tan ne'e nia fila ba uma. (Juí 18:22-26) Tuirmai, ema Dan ataka no sunu sidade Laís, depois harii fali ema Dan nia sidade. Jonatan no ninia oan-mane sira sai nu'udar amlulik ba suku Dan, no “estátua ne'ebé Miqueias mak halo, kontinua iha ne'ebá durante tempu hotu ne'ebé Maromak loos nia uma [tenda santu] iha Silo”. —Juí 18:27-31.

Ke'e no hetan buat murak husi Bíblia

w15 15/12 p. 10 par. 6

Tradusaun Bíblia ne'ebé moris

⁶ Ohin loron ita bele haree evidénsia barak ne'ebé hatudu katak ita tenkesér duni uza Maromak nia naran iha Bíblia. Iha tinan 2013, Jeová nia organizaun fó sai Bíblia *Tradusaun Mundu Foun*, edisaun revizaun nian iha lia-inglés. Iha edisaun ne'e, ita bele haree Maromak nia naran mosu dala 7.216. Iha edisaun tinan 1984 nian mosu de'it dala 7.210. Entaun

neen tan mai husi ne'ebé? Lima mai husi 1 Samuel 2:25; 6:3; 10:26; 23:14, 16. Ne'e tanba surat rohan husi livru Isaías ne'ebé hetan besik Tasi Mate mós iha Maromak nia naran iha versíkulu sira-ne'e. No liuhusi estuda liután kona-ba manuskritu antigu sira, sira hetan katak Maromak nia naran mós mosu iha Juís 19:18, entaun sira tau fali naran ne'e iha versíkulu ne'e.

17-23 JANEIRU

RIKUSOIN HUSI BÍBLIA | JUÍS 20-21

“Kontinua husu ba Jeová”

w11 15/9 p. 32 par. 2

Ita hatudu hahalok hanesan Finéas ka lae?

Kuandu ema Gibeá husi suku Benjamim estraga ema levita ida nia feen-ki'ik to'o nia mate, suku sira seluk bá halo funu hasoru ema husi suku Benjamim. (Juí 20:1-11) Maski sira husu Jeová nia ajuda antes sira bá funu, maibé sira lakon dala rua, no ema barak mate. (Juí 20:14-25) Ida-ne'e halo sira hanoin katak Jeová la hatán ba sira-nia orasaun ka lae? Jeová hakarak sira atu rezolve problema ne'e ka lae?

w11 15/9 p. 32 par. 4

Ita hatudu hahalok hanesan Finéas ka lae?

Ita bele aprende saida husi istória ne'e? Maski katuas sira halo orasaun atu husu Maromak nia ajuda no haka'as an atu rezolve problema ruma ne'ebé mosu iha kongregasaun, maibé dala ruma problema continua nafatin. Se nune'e, katuas sira presiza hanoin-hetan Jesus nia liafuan tuirmai ne'e: “Husu bá [ka halo orasaun], imi sei simu; buka bá, imi sei hetan; tuku odamatan bá, odamatan sei nakloke ba imi.” (Lc 11:9) Sin, maski dala ruma katuas sira sente katak Jeová la hatán kedas ba sira-nia orasaun, maibé sira bele fiar duni katak Jeová sei hatán iha tempu ne'ebé loos.

Ke'e no hetan buat murak husi Bíblia

w14 1/7 p. 7 p. 4-6

Hakarak hatene?

Oinsá mak ema uza tali liki kuandu halo funu iha tempu antigu?

David uza tali liki (ka tali dulas) hodi oho jigante Golias. David aprende atu uza ida-ne'e bainhira nia sei ki'ik no serbisu nu'udar bibitan.—1Sa 17:40-50.

Iha ema Ejitu no ema Asíria nia arte husi tempu Bíblia nian, bele haree dezeńu kona-ba tali liki ne'e. Buat ne'e iha hena ne'ebé halo husi animál nia kulit, no tali rua kesi iha hena ne'e nia sorin-sorin. Iha hena ne'e nia laran ema tau fatuk ne'ebé kabuar no kabeer. Fatuk ne'e boot hanesan sabraka no todan maizumenus grama 250. Iha tempu Bíblia nian, ema hi'it tali liki ba leten hodi dulas maka'as, depois husik tali sorin ida hodi fatuk bele semo. Fatuk ne'e semo maka'as no bele kona loos buat ne'ebé ema hakarak.

Sientista sira ne'ebé ke'e rai hetan tali liki barak ne'ebé ema uza iha funu iha tempu antigu. Funu-na'in sira ne'ebé iha esperiênsia barak bele tuda fatuk sira lalais hanesan komboiu ne'ebé halai maka'as. Maski matenek-na'in sira dehan katak hana rama mak semo dook liu, maibé tuda fatuk hanesan ne'e mós bele oho ema.—Juí 20:16.

24-30 JANEIRU

RIKUSOIN HUSI BÍBLIA | RUTE 1-2

“Hatudu domin ne'ebé laran-metin”

w16.02 p. 14 par. 5

Banati-tuir Jeová nia belun sira

⁵ Tuir loloos ba Rute, ne'e la problema ba nia atu fila ba Moab. Ninia família sei simu fali nia hodi tau matan ba nia. Nia mós koñese ema Moab nia língua no kultura tanba ne'e mak ninia língua no kultura rasik. Maibé, se nia fila ho

Noemi ba Belein, ne'e bele sai problema ida ba nia. Tan ne'e Noemi husu ba nia atu hela de'it iha Moab, tanba Noemi ta'uk katak nia la bele buka la'en foun ida ka uma ida ba Rute. Entaun, saida mak Rute deside atu halo? Orpa "fila fali ona ba ninia povu no **ninia maromak sira**". (Rut 1:9-15) Rute mós hakarak atu fila fali ba ninia ema no ninia maromak falsu sira ka lae? Lae.

w16.02 p. 14 par. 6

Banati-tuir Jeová nia belun sira

⁶ Karik liuhusi Rute nia la'en ne'ebé mate ona, ka liuhusi Noemi mak Rute aprende kona-ba Jeová. Jeová la hanesan duni ho ema Moab nia maromak sira. Tan ne'e mak Rute hakarak hadomi no adora Jeová. Tuirmai Rute foti desizaun matenek ida. Nia dehan ba Noemi: "Ita-nia povu sei sai ha'u-nia povu, no Ita-nia Maromak, ha'u-nia Maromak." (Rut 1:16) Rute hadomi tebes Noemi, maibé nia hadomi liu Jeová. Tan ne'e mak Boas gaba Rute tanba Rute buka protesau nia iha Jeová nia liras okos. (**Lee Rute 2:12.**) Boas nia liafuan halo ita hanoin fali manu-oan nurak sira ne'ebé subar iha manu-inan nia liras okos hodi proteje sira-nia an. (Sal 36:7; 91:1-4) Iha dalan ne'e duni mak Jeová proteje Rute. Nia fó kolen ba Rute tanba tau fiar ba nia. Ba Rute, desizaun ne'ebé nia halo mak desizaun ne'ebé di'ak tebes.

Ke'e no hetan buat murak husi Bíblia

w05-E 3/1 p. 27 par. 1

Pontu importante husi livru Rute

1:13, 21—Jeová mak halo Noemi nia moris moruk no susar ka lae? Lae. Noemi mós la duun no fó-sala ba Maromak. Maibé bainhira nia haree buat hotu ne'ebé akontese ona, nia hanoin katak Jeová la kontente ho nia. Nia sente nia moris moruk no lakon esperansa. Liután ne'e, iha tempu ne'ebá, ema barak hanoin katak iha oan mak bensaun husi Maromak, no se la iha oan, ne'e mak malisan. Tanba Noemi nia oan-mane na'in-rua mate ona no la

iha bei-oan ida, karik Noemi hanoin katak ne'e akontese tanba Jeová mak hamoe nia.

TREINU KONA-BA HAKLAKEN

ia kap. 5 par. 5-9

"Feto ne'ebé di'ak tebes"

⁵ Bainhira Rute hasai hotu musan husi sevada-kain ne'ebé nia hili no depois halibur hotu, nia hetan sevada musan maizumenus sasukat efa ida, ka maizumenus litru 22. Ida-ne'e katak nia halibur sevada musan besik kilograma 14! Rute tau sevada musan ne'e iha hena no kesi, depois tutur. Ikusmai, nia komesa la'o hodi fila fali ba Belein iha oras besik atu kalan.—Rut 2:17.

⁶ Bainhira Noemi haree ninia feto-foun mai fali, nia sai kontente. Karik Noemi hakfodak tanba Rute lori naha todan ho sevada musan barak. Rute mós lori hahán restu husi han-mejudia ne'ebé Boas fó ba serbisu-na'in sira, no sira na'in-rua Noemi han hamutuk aihan uitoan ne'e. Noemi husu: "Iha ne'ebé mak ó hili restu, no ó halo serbisu iha ne'ebé? Maromak sei haraik bensaun ba ema ne'ebé fó atensaun ba ó." (Rut 2:19) Sin, bainhira Noemi haree sasán todan ne'ebé Rute foin lori mai, nia hatene kedas katak ema ruma hatudu laran-di'ak ba ninia feto-foun ne'e.

⁷ Rute komesa konta kona-ba buat ne'ebé akontese iha loran ne'e no oinsá mak Boas hatudu laran-di'ak ba nia. Ida-ne'e halo Noemi hakso-lok, no nia hatete: "Biar nia simu bensaun husi Na'i Jeová, ne'ebé la tahan nia laran-di'ak ne'ebé nakonu ho domin ba ema ne'ebé moris no ema ne'ebé mate." (Rut 2:20) Noemi haree katak Boas nia hahalok laran-di'ak ne'e mai husi Jeová, tanba Jeová mak book ninia atan sira atu hatudu laran-luak no nia mós promete atu fó kolen ba ema ne'ebé hatudu hahalok di'ak sira-ne'e.—**Lee Provérbios 19:17.**

⁸ Noemi fó laran-manas ba Rute atu simu Boas nia laran-di'ak no kontinua hili sevada restu iha

ninia to'os no nafatin besik ho feto sira husi nia umakain atu mane sira labele book nia. Rute halo tuir. Nia mós “nafatin hela hamutuk ho nia banin-feto”. (Rut 2:22, 23) Dala ida tan, eskritura ne'e fó sai Rute nia hahalok furak, ne'e mak domin ho laran-metin. Rute nia ezemplu ne'e book ita atu apoia ita-nia familia ho laran-metin no sai prontu atu ajuda sira kuandu sira presiza. Jeová sei nunka haluha domin ne'ebé ita hatudu ba ita-nia família.

⁹ Ema balu hanoin katak Rute ho Noemi la'ós família ida ne'ebé kompletu tanba sira hanoin katak familia tenkesér iha feen, la'en, oan sira, no avó sira. Maibé, ezemplu husi Rute ho Noemi fó-hanoin mai ita katak maski família ida mak ki'ik de'it, sira mós família ne'ebé kompletu no bele hatudu domin no laran-di'ak ba malu. Oinsá ho ita? Ita hafolin ita-nia familia ka lae? Jesus mós fó-hanoin ninia dixipulu sira katak kongregasaun kristaun bele sai hanesan família rasik.—Mc 10:29, 30.

31 JANEIRU–6 FEVEREIRU

RIKUSOIN HUSI BÍBLIA | RUTE 3-4

“Haka'as an atu iha naran di'ak”

ia kap. 5 par. 18

“Feto ne'ebé di'ak tebes”

¹⁸ Boas ko'alia ba Rute ho lian mamar: “Ha'unia oan, Jeová sei haraik bensaun ba ó. Ohin ó hatudu laran-di'ak ne'ebé nakonu ho domin di'ak liu fali uluk, hodi la buka mane-klosan sira, maski kiak ka riku.” (Rut 3:10) Domin ho laran-metin ne'ebé Rute hatudu “uluk” mak kona-ba ninia domin ba Noemi hodi tuir nia to'o rai-Izraél no tau matan ba Noemi. Boas mós temi kona-ba domin ne'ebé Rute hatudu “ohin”. Boas hatene katak feto ne'ebé seidakau idade hanesan Rute bele buka mane ne'ebé sei joven maski riku ka kiak. Duké halo nune'e, Rute hanoin atu halo buat ne'ebé di'ak ba Noemi no mós ba Noemi nia la'en ne'ebé mate ona, tanba hodi halo ida-ne'e, mane ne'e nia

naran sei la lakon. Sin, Rute hanoin uluk ema seluk nia di'ak hodi la buka ninia rasik nia di'ak. Tan ne'e mak Boas gaba nia.

ia kap. 5 par. 21

“Feto ne'ebé di'ak tebes”

²¹ Karik Rute sente kontente tebes kuandu nia hanoin fali Boas nia liafuan katak ema hotu hatene Rute nu'udar “feto ne'ebé di'ak tebes”! Ita bele fiar katak ema hatete hanesan ne'e tanba Rute hatudu laran-manas atu hatene liután kona-ba Jeová no atu serbí nia. Rute mós hatudu laran-di'ak ba Noemi no ba ninia povu, hodi prontu atu halo tuir kostume iha Noemi nia rai maski ida-ne'e foun ba nia. Se ita banati-tuir Rute nia fiar, ita mós sei haka'as an atu hatudu laran-di'ak ba ema seluk no hatudu respeitu ba sira-nia kostume. Se ita halo nune'e, ita mós bele hetan naran di'ak hanesan Rute.

ia kap. 5 par. 25

“Feto ne'ebé di'ak tebes”

²⁵ Boas kaben ho Rute. Tuirmai, Bíblia hatete: “Ho Maromak Jeová nia bensaun, Rute ko'us no hahoris oan-mane ida.” Feto sira iha Belein fó bensaun ba Noemi no gaba Rute tanba buat ne'ebé Rute halo ba Noemi di'ak liu fali oan-mane na'in-hitu. Ikusmai, ita aprende katak Rute nia oan-mane sai Liurai David nia be'íala. (Rut 4:11-22) No David fali sai Jesus Kristu nia be'íala.—Mt 1:1.

Ke'e no hetan buat murak husi Bíblia

w05-E 3/1 p. 29 par. 3

Pontu importante husi livru Rute

4:6—Oinsá mak ema ne'ebé sosa fali bele “halakon” ninia liman-rohan rasik? Razaun primeiru mak se ema ida monu ba kiak no fa'an ninia rai ne'ebé nia simu nu'udar liman-rohan, ema ne'ebé sosa fali rai ne'e presiza selu osan hodi tuir tinan hira mak sei falta to'o Tinan Livre nian. (Lev 25:25-27) Kuandu halo ida-ne'e, ninia rikusoin rasik sai menus. Liután ne'e, kuandu Rute iha oan-mane,

ninia oan-mane mak sei simu rai ne'e nu'udar liman-rohan, la'ós família ne'ebé besik ho ema ne'ebé sosa fali rai ne'e.

7-13 FEVEREIRU

RIKUSOIN HUSI BÍBLIA | 1 SAMUEL 1-2

“Fó sai Ita-nia sentimentu ba Jeová liuhusi orasaun”

ia kap. 6 par. 12

Nia fó sai nia sentimentu ba Maromak iha orasaun

¹² Ana hatudu ezemplu di'ak ba Maromak nia atan sira hotu kona-ba oinsá atu halo orasaun. Jeová ho laran-di'ak konvida ita hotu atu ko'alia nakloke ba nia, hodi fó sai ita-nia sentimentu hanesan labarik ida ne'ebé ko'alia kona-ba buat hotu ba ninia inan-aman. (**Lee Salmo 62:8; 1 Tesalónika 5:17.**) Kona-ba halo orasaun ba Jeová, apóstolu Pedro mós hatete: “Entrega imi-nia laran-susar hotu ba nia, tanba nia hanoin imi.”—1Pe 5:7.

w07-E 3/15 p. 16 par. 4

Oinsá mak Ana bele sente dame

Saida mak ita bele aprende husi ida-ne'e? Kuandu ita halo orasaun ba Jeová kona-ba buat ne'ebé halo ita laran-susar, ita bele fó sai buat ne'ebé ita sente no ho laran husu ninia ajuda. Se ita labele halo tan buat ida atu rezolve problema, ita presiza husik ida-ne'e ba Jeová nia liman. La iha dalan seluk ne'ebé di'ak liu fali ida-ne'e.—Prv 3:5, 6.

Ke'e no hetan buat murak husi Bíblia

w05-E 3/15 p. 21 par. 5

Pontu importante husi livru 1 Samuel

2:10—Tanbasá mak Ana halo orasaun ba Jeová atu “fó kbiit ba ninia liurai” maski sei-dauk iha ema ida mak sai liurai ba nasaun Izraél? Moisés nia Ukun-Fuan fó-hatene nanis ona katak ema Izraél sei iha liurai. (Deu 17:14-18) Bainhira Jacob besik atu mate, nia mós

hatete: “Liurai nia ai-tonka [símbolu ba direitu nu'udar liurai] sei la hasai husi Judá.” (Gén 49:10) No mós kona-ba ema Izraél nia bei'ala naran Sara, Jeová hatete ona: “Nia sei sai nu'udar inan ba nasaun barak no ba liurai sira.” (Gén 17:16) Tan ne'e, Ana halo orasaun kona-ba liurai ne'ebé sei mosu iha futuru.

14-20 FEVEREIRU

RIKUSOIN HUSI BÍBLIA | 1 SAMUEL 3-5

“Jeová hanoin ema”

w18.09 p. 24 par. 3

Maromak Kbiit Boot Liu Hotu hanoin ema

³ Samuel komesa “serbí Jeová” iha tenda santu kuandu nia sei ki'ik. (1Sa 3:1) Kalan ida, kuandu Samuel toba tiha, buat ruma akontese ne'ebé la hanesan baibain. (1Sa 3:2-10) Nia rona lian ida bolu ninia naran. Nia hanoin katak Amlulik Boot Eli ne'ebé idade ona mak bolu, tan ne'e nia hadeer no halai ba Eli no dehan: “Ha'u mak ne'e, tanba Ita bolu ha'u.” Maibé Eli hatete ba nia: “Ha'u la bolu ó.” Kuandu ida-ne'e akontese tan ba dala rua, Eli rekoñese katak Maromak mak bolu Samuel. Entaun, nia hatete ba Samuel saida mak nia tenke halo no Samuel halo tuir. Tanbasá mak Jeová la hatete kedas ba Samuel katak nia mak bolu? Bíblia la esplika. Maibé karik Jeová hanoin labarik Samuel nia sentimentu.

w18.09 p. 24 par. 4

Maromak Kbiit Boot Liu Hotu hanoin ema

⁴ Jeová nia Ukun-Fuan fó mandamentu ba oan sira atu hatudu respeitu ba ema ne'ebé idade, liuliu ba xefe. (Éx 22:28; Lev 19:32) Tan ne'e, karik susar ba Samuel ne'ebé sei ki'ik atu hadeer iha dadeer no ho aten-brani hato'o Maromak nia mensajen tesi-lia nian ba Eli. (1Sa 3:11-18) Bíblia hatete katak Samuel “ta'uk atu konta vizaun ne'e ba Eli”. Maibé, Jeová halo Eli hatene katak Nia mak bolu Samuel. Tan ne'e, Eli haruka Samuel atu fó sai

buat hotu, nia dehan: “[Keta] subar husi ha’u liafuan ida husi buat ne’ebé nia hatete ona ba ó.” Samuel halo tuir Eli no “konta buat hotu ba Eli”.

Ke’e no hetan buat murak husi Bíblia

w05-E 3/15 p. 21 par. 6

Pontu importante husi livru 1 Samuel

3:3—Samuel toba duni iha Fatin Santu Liu Hotu ka lae? Lae. Samuel mak ema Levi, jera-saun Kohat nian ne’ebé la iha knaar atu serbí nu’udar amlulik. (1Kr 6:33-38) Tan ne’e, nia la-bele “tama hodi haree buat santu”. (Núm 4:17-20) Fatin ne’ebé Samuel bele tama mak tenda santu nia pátiu de’it, no ita bele fiar kataka Samuel toba iha fatin ne’e. Karik Eli mós toba iha fatin ruma iha área ne’e. Evidénsia hatudu katak “fatin ne’ebé tau Maromak nia Arka” refere ba área tenda santu nian.

21-27 FEVEREIRU

RIKUSOIN HUSI BÍBLIA | 1 SAMUEL 6-8

“Sé mak Ita-nia Liurai?”

it-2-E p. 163 par. 1

Maromak nia Ukun

Povu hakarak ema ida mak ukun sira nu’udar liurai. Besik tinan 400 liutiha husi tempu ne’ebé ema Izraél sai husi Ejitu no tinan 800 liu ona husi tempu ne’ebé Maromak halo aliansa ho Abraão, povu Izraél husu atu ema ida mak dirije sira nu’udar liurai hanesan ho nasaun sira seluk. Buat ne’ebé sira husu hatudu katak sira la simu Jeová nu’udar liurai ne’ebé ukun sira. (1Sa 8:4-8) Klaru katak povu sei hein ba Maromak nia ukun tanba nia promete nanis ona ba Abraão no mós ba Jacob. Sira-nia esperansa ne’e bazeia mós ba Jacob nia profesia kona-ba Judá (Gén 49:8-10), Jeová nia liafuan ba povu Izraél bainhira sira sai ona husi rai-Ejitu (Éx 19:3-6), aliansa Ukun-Fuan nian (Deu 17:14, 15), no mós Maromak nia

lia-menon ne’ebé hato’o liuhusi profeta Balám (Núm 24:2-7, 17). Samuel nia inan Ana mós fó sai ninia esperansa ne’e liuhusi ninia ora-saun. (1Sa 2:7-10) Maibé Jeová la fó sai ho kompletu ninia “segredu santu” kona-ba Ukun ne’e, no la fó-hatene kona-ba bainhira mak Ukun ne’e sei to’o mai ka oinsá mak governu ne’e sei hala’o. Jeova mós la fó sai governu ne’e sei ukun iha rai ka lalehan. Entaun, bainhira povu husu fali atu iha ema ida mak sai liurai, sira husu buat ne’ebé la’os sira-nia direitu.

ia kap. 8 par. 18

Nia tahan ninia sentimentu laran-tun

¹⁸ Bainhira Samuel halo orasaun hodi fó sai povu nia hakarak, Jeová hatete: “Rona ba povu nia liafuan hotu, tanba la’os ó mak sira la simu, maibé ha’u mak sira la simu nu’udar sira-nia liurai.” Karik liafuan ne’e fó kmaan ba Samuel, maibé iha tempu hanesan, ne’e halo Samuel sente la di’ak duni tanba ema hatún Maromak ne’ebé Boot Liu Hotu! Jeová haruka Samuel atu fó avizu kona-ba buat ne’ebé sei akontese ba ema Izraél kuandu ema mak ukun sira nu’udar liurai. Bainhira Samuel hato’o liafuan ne’e, povu sira nafatin hatete: “Lae, ami hakarak liurai ida mak ukun ami!” Tan ne’e, Samuel halo tuir Maromak hodi kose mina ba liurai ne’ebé Jeová hili ona.—1Sa 8:7-19.

w10 15/1 p. 30 par. 9

Maromak Jeová nia dalan atu ukun mak di’ak liu hotu!

⁹ Istória hatudu katak avizu ne’ebé Maromak Jeová fó, sai loos duni. Ema nia ukun lori problema barak ba ema Izraél, liuliu kuandu liurai la laran-metin ba Maromak. Kuandu ita hanoin kona-ba Izraél nia ezemplu, ida-ne’e ajuda ita atu komprende tansá mak ukun-na’in sira ne’ebé la hatene Maromak Jeová, la bele lori buat di’ak ne’ebé ba nafatin. Loos katak ukun-na’in balu husu Maromak nia

bensaun ba sira-nia haka'as-an atubele ukun ho dame no hakmatek, maibé oinsá mak Maromak bele haraik bensaun ba sira ne'ebé la simu ninia ukun?—Sal 2:10-12.

Ke'e no hetan buat murak husi Bíblia

w02-E 4/1 p. 12 par. 13

Tanbasá hetan batizmu?

¹³ Antes atu hetan batizmu nu'udar Testemuña ba Jeová, ita presiza troka ita-nia moris. Ne'e mak buat ne'ebé ema ida halo ho haka-rak rasik bainhira nia deside ho laran tomak atu moris tuir Kristu Jesus. Ema hanesan ne'e sei husik sira-nia moris uluk nian no deside atu halo buat ne'ebé loos tuir Maromak nia haree. Iha Eskritura sira, liafuan Ebraiku no Gregu ne'ebé tradús nu'udar fila fali ba Maromak, fó ideia kona-ba ema ida troka dire-saun. Ne'e katak ema ne'ebé uluk la'o iha dalan sala troka ninia dalan hodi fila fali ba Maromak. (1Rs 8:33, 34) Atu halo ida-ne'e, ita presiza 'hahalok ne'ebé hatudu katak ita arrende an'. (Aps 26:20) Ita presiza husik tiha adorasau falsu, halo tuir Maromak nia mandamentu sira, no laran-metin ba Jeová mesak de'it. (Deu 30:2, 8-10; 1Sa 7:3) Kuandu ita troka ita-nia moris, ita mós sei troka ita-nia hanoin, objetivu no atitude. (Eze 18:31) Ita "fila fali ba Maromak" kuandu ita husik ita-nia moris uluk nian no troka fali ho hahalok ne'ebé foun.—Aps 3:19; Éf 4:20-24; Kol 3:5-14.

28 FEVEREIRU–6 MARSU

RIKUSOIN HUSI BÍBLIA | 1 SAMUEL 9-11

"Foufoun Saul haraik an no rekoñese ninia limitasaun"

w20.08 p. 10 par. 11

Haraik an no rekoñese ita-nia limitasaun

¹¹ Hanoin to'ok kona-ba buat ne'ebé akontese ba Liurai Saul. Nu'udar mane joven, nia mak

ema haraik an, rekoñese ninia limitasaun, no mós la ansi atu simu responsabilidade liután. (1Sa 9:21; 10:20-22) Maibé ikusmai nia sai foti an no halo buat ne'ebé nia la iha direitu atu halo. Nia komesa halo nune'e lakleur depois nia sai liurai. Loron ida, nia la hatudu pasiénsia bainhira nia hein profeta Samuel. Duké tau fiar ba Jeová atu ajuda ninia povu, Saul hasa'e sakrifísiu sunu nian maski nia la iha direitu atu halo nune'e. Rezultadu mak Jeová la kontente ho nia no la simu tan nia nu'udar liurai. (1Sa 13:8-14) Di'ak atu aprende husi ezemplu ne'e no labele halo buat ne'ebé ita la iha direitu atu halo.

w14 15/3 p. 9 par. 8

Hatudu hahalok ne'ebé la hanoin an de'it

⁸ Ezemplu husi Liurai Saul sai nu'udar avizu mai ita kona-ba oinsá mak ema ida bele haburas hahalok hanoin an de'it. Kuandu Saul foin sai liurai, nia ema ne'ebé haraik-an. (1Sa 9:21) Nia haraik-an hodi hili atu la fó kastigu-mate ba ema Izraél ne'ebé ko'alia kontra ninia pozisaun ne'ebé Maromak fó ba nia. (1Sa 10:27) Liurai Saul mós halo tuir mata-dalan husi Maromak nia espíritu hodi dirije ema Izraél atu halo funu hasoru ema Amon. No kuandu nia manán funu ne'e, nia hatudu haraik-an hodi fó glória hotu ba Jeová.—1Sa 11:6,11-13.

w95-E 12/15 p. 10 par. 1

Ema Ammon selu fali Jeová nia laran-di'ak ho hahalok aat

Dala ida tan ema Ammon selu fali Jeová nia laran-di'ak ho hahalok aat hodi halo sira-nia an sai Jeová nia inimigu. Jeová la taka matan ba sira-nia hahalok ne'ebé amesa ninia povu. "Bainhira Saul rona [Nahas nia] liafuan sira-ne'e, Maromak nia espíritu fó kbiit ba nia, no ninia hirus lakan maka'as." Maromak nia espíritu dirije Saul atu halibur tropa na'in-330.000 atu oho ema Ammon no "sira ne'ebé moris hela halai namkari mesamesak".—1Sa 11:6, 11.

Ke'e no hetan buat murak husi Bíblia

w05-E 3/15 p. 22 par. 8

Pontu importante husi livru 1 Samuel

9:9—Ita bele aprende saida husi liafuan “iha tempu uluk ema bolu profeta nu’udar konsellu-na’in”? Karik ne’e hatudu katak ema rekoñese liutân profeta sira iha Samuel nia tempu, no durante tempu ne’ebé liurai sira mak ukun Izraél, liafuan “konsellu-na’in” ka “vidente” troka fali ho liafuan “profeta”. Tuir Bíblia, Samuel mak ida primeiru ne’ebé ema bolu nu’udar profeta.—Aps 3:24.

TREINU KONA-BA HAKLAKEN

w15 15/4 p. 6-7 par. 16-20

Katuas sira, tanbasá importante treinu irmaun seluk?

¹⁶ *Hanorin ho laran.* Bainhira Samuel rona katak ema Izraél sira hakarak atu iha ema ida sai sira-nia liurai, nia sente laran-triste tebes tanba nia sente ema sira-ne’e lakohi tan nia ona. (1Sa 8:4-8) Ema sira-ne’e husu ba nia atu buka liurai ida, maibé Samuel lakohi rona sira to’o Jeová mak haruka nia dala tolu atu rona ba ema sira-ne’e. (1Sa 8:7, 9, 22) Maski Samuel nia laran sente triste maibé nia la laran-moras ka odi fali ema ne’ebé mak atu troka nia sai lideransa foun ne’e. Bainhira Jeová haruka Samuel bá ordena Saul hodi fui mina ba nia, nia halo tuir kedas, nia la sente laran-todan ka la hanoin katak ne’e ninia serbisu entaun tenke halo de’it. Samuel halo tuir ho laran tanba nia hadomi Jeová.

¹⁷ Ohin loron, iha mós katuas ho esperiênsia tinan barak ne’ebé halo tuir Samuel nia ezemplu hodi fó treinu ho laran-di’ak ba ema seluk. (1Pe 5:2) Katuas sira-ne’e la hanoin katak fó tiha treinu ba ema seluk, bele halakon fali sira-nia knaar iha kongregasaun. Mestre di’ak ida la haree ninia alunu nu’udar ema ne’ebé mak atu hadau ninia knaar, maibé haree sira

hanesan “maluk serbisu-na’in”, presente furak husi Maromak atu ajuda tau matan ba kongregasaun. (2Ko 1:24; Ebr 13:16) Irmaun katuas sira kontente tebes bainhira haree alunu uza sira-nia matenek atu ajuda fali kongregasaun tomak!—Aps 20:35.

¹⁸ *Sai belun ida, la’ós de’it mestre.* Bainhira Samuel hasoru Saul, tuir loloos nia bele hasai kedas ninia botir hodi fui mina ba Saul, no ordena nia sai liurai foun ida. Maibé ne’e la ajuda Saul atu prepara oinsá atu tau matan ba Maromak nia povu. Samuel gasta duni tempu uitoan hodi ajuda Saul prepara ninia laran ba knaar foun ne’e. Antes atu ordena Saul, sira han hamutuk, la’o halimar, ko’alia, no toba deskansa uitoan. Samuel hein to’o momentu di’ak mai mak nia foin fui mina ba Saul.

¹⁹ Hanesan ne’e mós ohin loron. Antes fó treinu ba ema ida, mestre presiza buka uluk momentu ne’ebé di’ak no haburas uluk relasaun di’ak ida ho alunu. Karik iha rai ida-idak iha kostume ka kultura ne’ebé la hanesan. Ne’e bele hanetik mestre ho alunu atu haburas relasaun ne’ebé besik ba malu hanesan belun. Maski nune’e, se katuas ida mak uza ninia tempu hodi ajuda ninia alunu, alunu mós bele sente katak Ita hafolin tebes nia. (**Lee Roma 12:10.**) Alunu sira sei sente agradese tebes ba ajuda ka treinu ne’ebé katuas fó ba sira.

²⁰ Mestre ne’ebé susesu mak mestre ne’ebé gosta atu fó treinu ema seluk. Maibé nia mós tenke hadomi ema ne’ebé nia fó treinu daudaun. (Kompara ho João 5:20.) Tanba se alunu mak hatene ka sente katak ita hadomi ka hafolin nia, ne’e fasil ba nia atu aprende ho lalais. Entaun irmaun katuas doben sira, nu’udar imi fó treinu ba ema seluk, haka’as an la’ós atu sai mestre de’it, maibé mós sai belun di’ak ho ema sira-ne’e.—Prv 17:17; Jo 15:15.

